



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : Tir Yimyim

tiryimyim@aolima

tir yimyim

TAPAK 6

ISSF World Cup: Elavenil-i Rio de Janeiro nung gold medal angu

PM Modi-i 'Amrit Brikshya Andolan' atema Assam CM tenung asanger



VOL. XX NO. 337 (ADOK 337) DIMAPUR TENTONÜ (MONDAY)

RONGJUI (SEPTEMBER) 18, 2023

₹ 5.00

WHO-i China dang Covid poktetba osang meshir

New Delhi, September 17, 2023 (Agencies): World Health Organization (WHO) Director-General Tedros Adhanom Ghebreyesus-i China dang COVID-19 poktetba osang talila lemsatepsü ayongzükogo.

“Onoki China dang tenokdangba kecha melii Covid poktetba bushisüngdangtsü atema rongshir. Onoki linüktem dang China den senden amendang iba onük benoka jembitsü ashir” ta WHO Director-General-i osangbener dang ashi.

Alima nung health ketdangsurtem aser pharmaceutical company temi

coronavirus variants tasenten poktetba anema raratsü vaccines yanglutsü merangtepba mapang ka nung pai iba osang metetdaksüogo.

Ghebreyesus-i mapang talangka tejaklen nungi China dang COVID-19 poktetba indang osang lemsatepsü rongshia arur.

COVID-19 virus ya mezüng China yimti Wuhan nung December 2019 nung jangjateta liasü. Nisung aikati iba virus ya shiruru shishilembadak ka nungi adok ta temulung melemi bilemer. Iba virus ya alima ajungalen prokshi aser nisung million 7 jungnüa tepsetogo.

Congress-i Parliament nung Women's Reservation Bill agizüksü akhanger

New Delhi, September 17, 2023 (Agencies): Hobar nungi tenzüka hopta ka piyong Parliament special session alidang Women's Reservation Bill agizüksü atema Congress-i takhangba agütsüogo.

“Parliament special session nung Women's Reservation Bill agizüksüla ta Congress Working Committee-i takhangba agütsür” ta Congress lennir Jairam Ramesh-i metetdaksü.

Tesüiba Congress sorkartemi tetsürtem nem shilem lemsüksüba mapa inyaka aruba atema tenüngsang agütsür ta pai ashi.

“Taoba prime minister Rajiv Gandhi-i May 1989 nung panchayats aser nagarpalikas tetsür nem shilem asemü nungi ka lemsüksü atema mezüngbuba Constitution Amendment Bills benoka liasü. Iba bill Lok Sabha nungbo agizük saka Rajya Sabha nung magizük” ta Jairam Ramesh-isa ashi.

“Taoba Prime Minister PV Narasimha Rao-i April 1993 nung panchayats aser nagarpalikas nung tetsürtem nem shilem asemü nungi ka lemsüksü Constitution Amendment Bills tanaben benoka liasü. Idangji Bill anaprong agizüka ozüng aküm. Tang panchayats aser

nagarpalikas nung tetsür lakh 15 tema inyakdar” ta paisa shisem.

Taoba PM Manmohan Singh-i Parliament aser state assembly tem nung tetsür nem shilem asemü nungi ka lemsüksü Constitution Amendment Bill benok. March 9, 2010 nung iba Bill Rajya Sabha nung agizük saka Lok Sabha nungbo mebenok.

“Rajya Sabha nung benokba/agizükba bill mapang metembanger anungji Women's Reservation Bill tanga taküm lir. Congress party-i tesüiba küm 9 tashi Rajya Sabha nungi agizüka aliba Women's Reservation Bill Lok Sabha nunga agizüksüla ta takhangba agüja arur” ta Ramesh-isa metetdaksü.

Maneni, Parliament special session agitsü jakdang Deobarnü party ajak senden amendang Opposition party ajaki Women's Reservation Bill agizüksü takhangba agütsüogo ta Congress lennir Adhir Ranjan Chowdhury-i ashi.

Nationalist Congress Party lennir Praful Patel-ia Centre dang Parliament session nung Women's Reservation Bill agizüksü mepishia metetdaksüogo. NCP ya Maharashtra nung Bharatiya Janata Party (BJP) den yaritepba telok ka lir.

Manipur nung IAF-i poppy alutem samatsütsü

Imphal, September 17, 2023 (Agencies): Manipur nung poppy alutem samatsütsü atema Centre sorkari Indian Air Force (IAF) indang tayimtsütem ajanga bomb amshitsü ta Coordinating Committee on Manipur Integrity (COCOMI)-i metetdaksüogo.

COCOMI ya Manipur nung Meitei lokti tentet aika senteper tentetba telok ka lir aser parnoki ashiba agi “Union Defence Minister Rajnath Singh-i iba ya nangzük.”

Manipur sorkari Centre dang bomb amshia poppy alutem poksatsütsü asüngdangra IAF-i

parnok tayimtsütem amshitsü ta defence minister Rajnath Singh-i nangzükogo ta COCOMI-isa ashi.

“Onoki IAF tayimtsütem amshia poppy alutem raksatsütsü mepishi. Idangji defence minister-i Manipur sorkari asüngdangra ibaji inyaksü akok ta langzü” ta COCOMI-isa metetdaksü.

Delhi Meitei Coordinating Committee (DMCC)-i tawa tu Rajnath Singh den ajurutep aser pa dang Kuki narco-terrorist ajanga national security lendong bentsür aruba osang lemsatepogo ta COCOMI-isa ashi.

Nagaland nung PM Vishwakarma Scheme tenzüksüogo



September 17, 2023 nü De Oriental Grand, Kohima nung PM Vishwakarma Scheme tenzükba sentong nung Union Minister of State for Fisheries, Animal Husbandry and Dairying, Dr Sanjeev Kumar Balyan aser Labour, Employment & Skill Development Advisor Moataoshi Longkumer na den tangartem külemi agiba noksa angur.

Kohima, September 17, 2023 (TYO): Linük den külemi Nagaland nunga Union Minister of State for Fisheries, Animal Husbandry and Dairying, Dr Sanjeev Kumar Balyan-i PM Vishwakarma Scheme tenzüksüogo.

Lord Vishwakarma Jayanti aser Prime Minister Narendra Modi arishi küm 73 ajungba anogomong nung PM Vishwakarma Scheme tenzüksüogo.

“PM Vishwakarma Scheme ya Prime Minister Narendra Modi ajanga shisatetba scheme ka lir. Sorkari teka mapa ashirtem tashi itdaksütsü aser India tejakleni anir aotsü tenangzükba nung iba mapa tenzükur” ta Kohima nung aliba De Oriental Grand nung iba sentong tenzüksüdag Dr Balyan-i ashi.

Linük nung mapa inyakterem aser talisa informal sector nung inyakterem tashi itdaksütsü atema iba scheme tenzükur ta pai ashi.

“India nung takotet mapa inyakterem lir aser iba Scheme ajanga skill balala shia meteterem

teimba akümtsü. Alima kanga kara ainba putu ka nung iba scheme maneni ajanga upskilling aser reskilling asütsü nungdakba ajiteter” ta Dr Balyan-isa shisem.

“PM Vishwakarma Scheme ajanga onoki skills development aser entrepreneurship atema lenmangtem lapoktsür, innovation aser creativity ajungmesor aser asen sensotemi sen teimba aazüksü” ta paisa metetdaksü.

“Nagaland aser State ajak nung traditional craftsmen-i digital sabangtem nung digital transactions shia Rs.1 agi products sayutettsü. Technology indang tashi ajanga kinük ajak atongba dang masü saka senotsü teimba aazükettsü” ta Dr Balyan-isa ashi.

“PM Vishwakarma Scheme ya sorkar sentong ka dang masü saka asen senso takümtem melenshitsu atema movement ka lir. Iba ajanga sorkar aser nübortem külem alizüng ka atema longjemra asenoki metongtetba kecha mali ta sayur” ta Union MoS-isa ashi.

Iba Scheme kübok ghonda 40 basic training agütsütsü aser iba atema anogoshia Rs 500 stipend agütsütsü aser Rs 15,000 indang tool kit ka grant ama agütsütsü, ta pai ashi.

Teka mapa inyakteremi mezüngbuba trench nung Rs 1 lakh collateral free loan agitsü akok aser tanabuba trench nung sen tetemlok 5% agi Rs 2 lakh agitsü akok. Iba atema MSME aser Credit Guarantee fee 8% ji Centre sorkari agütsütsü ta paisa metetdaksü.

“Sector 18- Carpenters, Boat Makers, Armourers, Blacksmiths, Hammer and Tool Kit Makers, Locksmiths, Goldsmiths, Potters, Sculptor, Stone breakers, Cobblers (Shoesmiths/ Footwear artisans), Masons (Rajmistri), Basket/Mat/Broom Makers/Coir Weavers, Doll & Toy Makers (Traditional), Barbers, Garland makers, Washermen, Tailors aser Fishing Net Makers ajanga iba tajangzük agitsü akok” ta Union Minister of State Dr Sanjeev Kumar Balyan-isa metetdaksü.

Nagaland nung micro-entrepreneurship inyaksü lenmang peria lir

Kohima, September 17, 2023 (TYO): Nagaland nung micro-entrepreneurship maparen jenti inyaksü lir aser iba ajanga mapa manguba khuret ajema akümtsü akok ta Labour, Employment & Skill Development Advisor Moataoshi Longkumer-i ashi.

Nagaland nung PM Vishwakarma Scheme tenzükba sentong nung pai iba osang metetdaksü.

“Nagaland nung nisung teimba kati sorkar mapa dak dang metaloker ajisüaka sorkar mapa mali kümogo. Iba den industry maparen maliba aser private sector junga teteta maliba ajanga zünger mapa manguba lanur jenti kümogo” ta pai ashi.

:Mapa manguba khuret koktetsü atema entrepreneurship ya lenmang kalir anungji asenoki sobaliba nungi inyaka aruba

mapatem asentenshiba aser ajungketba ajanga rongsenketzüng ajungkettsü lenmangtem bushitepsüla” ta Advisor Moatoshi-i ashi.

“India rongsenketzüng nung skilled artisans aser craftspeople ajanga shilem tulu agir. Parnoki blacksmithing, goldsmithing, pottery, carpentry, sculpting aser ibala mesükba teka mapa inyaker. Iba mesükba informal sector nung inyakterem dang ‘Vishwakarma’ ta ajar” ta pai metetdaksü.

Nagaland nung sobaliba nungi inyaka aruba mapa jenti lir aser item mapa ya putu aika inyaka arur. Item mapa inyakba ajanga rongsenketzüng renloktsü aser tashi itshitsü koka lir, ta Moatoshi-isa ashi.

“Asenoki item skills agizükba aser support o training agütsüra iba ajanga rongsenketzüng lenmang

lapoktsü. Iba ajanga zünger mapa mangurtemi mapa inyaksü maongka angutsü” ta paisa ashi.

“Asenoki traditional skills asentenshia benshira aser sobaliba wazüka ayutsü. Skill tem ya pei pei kin putiotsü nun tera yanga lir aser asenoki itemji wazüka ayuba ajanga atrutsü putu nem angazükdaksür asütsü aser iba ajanga asen sobaliba maittsü mesamadaksüi kümzüka ayutsü. Iba ajanga rongsenketzüng tsütsü aser talisa tourism sector nung tajangzük kanga alitsü” ta Advisor Moatoshi-isa metetdaksü.

“PM Vishwakarma Scheme ya Nagaland atema renemba scheme ka ama lir aser iba ya asen lokti aser sobaliba inyakyim den kanga putepa lir. Anungji asenoki Naga sobaliba senmang ajanga rongsenketzüng renloktsü ayongzükur” ta paisa ashi.

Dimapur nung Swachhata League 2.0 aser Safai Mitra Suraksha Shivir tenzükogo



City Tower, Dimapur nung Honibarneep Swachhata League 2.0 aser Safai Mitra Suraksha Shivir sentong tenzükoger tangokba noksa ka nung Advisor, Tribal Affairs, H. Tovihoto Ayemi müketa Deputy Commissioner, Dimapur, Sachin Jaiswal; Administrator, DMC, W. Manpai Phom aser volunteers tem aliba noksa nung angur.

Dimapur, Rongjui/Sept. 17 (TYO): Advisor, Tribal Affairs, Government of Nagaland, H. Tovihoto Ayemi-i Honibarneep City Tower, Dimapur nung Indian Swachhata League 2.0 aser Safai Mitra Suraksha Shivir sentong tenzükoga liasü, koba Dimapur Municipal Council ajanga ayongzükga liasü. Iba sentong ana ya Swachhata Hi Seva sentong nung shilem ka lir, koba September 15 nung tenzük aser October 2 nü atemtsü. Swachhata Hi Seva ya Swachh Bharat Diwas jakdang ayongzükba sentong ka lir. Swachh Bharat Diwas ya Mahatma Gandhi nem akum agüja pa asoba anogo nung amunger. Iba sentong nung jembidang

Advisor Tovihoto Ayemi-i ashiba agi, Dimapur nung mürekmejuba tsütsü terenlok jenti angur saka jana-reja maliba yimti ka akumtsü asoshi ano mapa jenti inyaksü nüngdaker aser iba atema senso ajaki inyaksü mapa lir aser tesem mashi nung tapi agi jana indoka menenba anentsüla. Dimapur nung tang dengue tashidak tali akumba ya talisa pei müketa aliba tesem müreka mayuba ajanga lir, kechiaser item tesemtem nung dengue adokdaksüba merila apoker aser asenoki pei aliba tesem aser temeket müreka ayutsü mangatet tashi item tashidak yagi asenok teti tim atemtsü, ta pai ashi. Asenoki kima yimtung aoker mesüra Dimapur Municipal

Council dak kisung metaloka alila masü, saka yimti nung jana samadaksütsü asoshi senso ajak khuret lir, ta ashi. Lipajen temürek nung tangatetba tajung nung anemtepa alitsü asoshi asenok ajaki ano maneni bendanga agütsür inyaksü imlar, ta Advisor Tovihoto-isa ashi. Iba sentong nung Deputy Commissioner, Dimapur, Sachin Jaiswal-i iba sentong ayongzükba nükjidong rateta ashi aser iba campaign indang tenangzükba zünga shia liasü. Kasa sentong nung DMC Administrator, W. Manpai Phom-i tarur pela agizükba o jemi aser Team Better Dimapur tir, Mhonian-i mürekmejua alitsü onük nung ajemdaker jembia liasü.

Naga political party katia 'business' meinyaker: NSCN/GPRN

Dimapur, Rongjui/Sept. 17 (TYO): Senotsü saruba (taxation) indang tawa media balala nung prokshiba dak sendakba nung NSCN/GPRN ajanga sangdong ka agütsüogo. Naga political party telok katia tajangzük asoshi 'public undertakings of business' agiba tanü tashi NSCN/GPRN-i memetet ta jangjatsür, ta sangdong ajanga ashi.

Iba ken o dak sendakba nung Naga political party temi media nung ola madokba ajanga nüburttem mangmangba jangjatsür aser lokti tentet ka ama Naga political party kata tajangzük asoshi shishilempaba tsütsü kibur ama mali saka züngsemtem pei sasep nung shishilempaba maparen inyaker, ta sangdong ajanga ashi.

NSCN/GPRN züngsem kar danga Yehzabo nung aibelenba putetra parnok Yehzabo nung mela aliba ama tapet temerenshi agütsütsü. Nüngja balala amshiaka Naga political party ajak Naga nunger ajungtsü atema asen temenden kumzükga aser wazükga ayutsü asoshi dang nokdaker ta amanger, ta NSCN/GPRN sangdong ajanga ashi.

Manipur nung security forces-i hadir aika ngutet



Kohima, Rongjui/Sept. 17 (TYO): Itdangiter osang tejangja ka nung ajemdaker Army, Assam Rifles, CAPF aser Manipur Police temi Manipur nung Churhandpur district kübok Khodang yimtsüng nung mita aoba mapang nok-nü, injang aser

raradang amshiba oset balala nguteta liasü, ta Honibarnü sangdong ka ajanga ashi. Iba mapang Improvised Mortars 14 aser Single Barrel prangbong ka densema hadir 15 aser danga oset balala nguteta liasü. Ano iba mesük Thoubal nunga

Assam Rifles aser Thoubal police lungjemer September 15, 2023 nü Kwarok Maring nung operation ka tenzükga meita aoba mapang 9mm carbine ka den raradang amshiba hadir nguteta liasü. Item oset ajak police nem amoktsüogo, ta sangdong ajanga ashi.

Peren nung tashidak balala atema awareness agütsü

Dimapur, Rongjui/Sept. 17 (TYO): Peren district nung dengue aser Japanese encephalitis (JE) tashidak tali akumba mechi National Center for Vector Borne Disease Control (NCVBDC) Peren ajanga awareness campaign balala ayongzükga liasü. Awareness campaign aser seminar mapang Vimekhrie U Metsieo, Consultant, NCVBDC Peren ajanga ramen samadaksütsüba, nüburttem teinyaksü indang jemi aser district nung sentong balala takok ngua agütsü atema nüburttem dang tashi angatempa yariteptsü ayongzükga liasü.

iba tashidak asoshi mozü tejangja ka mali, anungji iba tashidak nungi kumzükga ayutsü mera balala agütsüji tongtipangtiba lir, ta pai ashi. August ita College of Veterinary Science & Animal Husbandry, Jalukie den lungjemer JE agi kongshia aliba kibongtem nungi ak dak nungi azü tuzükga sample tenet bener yokba nung sample ajak nung JE virus aliba putet, ta pai ashi. Medical Department dak sendakba inyakyim nung nüburttemi telangzükga junga magütsür aser amalitep makar, ta pai sasa bilemba shia liasü. Item tashidak ya sorkari bener arur masü, anungji item tashidak azioktsü asoshi sorkari pei meshizüng tashu arua inyaksütsü meimlatsüla, saka nüburttemi tongti shilem agia nüburttem tashidak balala nungi kumzükga alitsü mera agütsüla, ta Dr. Hedungkiebe-i ashi. Menatepa aoba tashidak azioktsü asoshi maparen balala inyakba nung nüburttemi temolung agütsütsüla, kechiaser tashidak nungi taneptsü anguba dangbo mezüngyongi kumzükga alibaji tajungba, ta ashi. Item sentong ya Ngwalwa jila aser Gaili yimtsüng nung August 16, 2023, St. Xavier College nung August 18, 2023, Jalukie main town area nung September 14, 2023 anogotem agia liasü. Maneni arogo pongu nungi lenirtem den item tashidak nungi jenbua alitsü seminar ka DVBO Office, Jalukie nung September 14, 2023 aser District Hospital Peren nung arogo trok asoshi September 15, 2023 nü seminar ka agüja liasü.

Lai linük, Nagaland aser Peren district nung tashidak balala indang data lemsatep aser iba mapang district nung JE tashidak nisung pezü dak aser dengue tashidak nisung asem dak puteta lir aser ano item tashidak agi shiranger ama nisung kar lir, ta ashi. District Vector Borne Officer Peren, Dr. Hedungkiebe-i sentong balala nung merila amala shiruru agi metepba ajanga tashidak menatepa aoba, item tashidak nungi kumzüktsü meratem lemsatepa liasü. Mapa inyakba mapang tula aser long pant talang asemtsüla, merila meindokba mozü aser meria sü kidang amshiba kisung masü saka arem aser alu nunga amshitsü pai ashi. Ano talisa merila entzü akoba tesem ajemdakja tzü atsüngtena aliba azüngtettsü/ yimdoktsü, merila alidan tesem müreka ayutsü pai ashi. Tang dengue tashidak pokteta aliba indang jembidang,

Peren district nung tashidak balala indang data lemsatep aser iba mapang district nung JE tashidak nisung pezü dak aser dengue tashidak nisung asem dak puteta lir aser ano item tashidak agi shiranger ama nisung kar lir, ta ashi. District Vector Borne Officer Peren, Dr. Hedungkiebe-i sentong balala nung merila amala shiruru agi metepba ajanga tashidak menatepa aoba, item tashidak nungi kumzüktsü meratem lemsatepa liasü. Mapa inyakba mapang tula aser long pant talang asemtsüla, merila meindokba mozü aser meria sü kidang amshiba kisung masü saka arem aser alu nunga amshitsü pai ashi. Ano talisa merila entzü akoba tesem ajemdakja tzü atsüngtena aliba azüngtettsü/ yimdoktsü, merila alidan tesem müreka ayutsü pai ashi. Tang dengue tashidak pokteta aliba indang jembidang,

Kohima nung Indian Swachhata League 2.0 sentong agi



September 16, 2023 nü Old NST, Kohima nung Indian Swachhata League 2.0 sentong alidang tangokba noksa ka nung MLA Dr. Tseilhoutuo Rhutso angur.

Dimapur, Rongjui/Sept. 17 (TYO): Swachh Bharat Mission kübok Swachhata League 2.0 sentong Kohima Municipal Council ajanga Jakhama Baptist Fellowship, Kohima den lungjemer September 16, 2023 nü Kohima nung ayongzükga liasü. Indian Swachhata League 2.0 semzükba sentong ya MLA, Dr. Tseilhoutuo Rhutso-i moaja liasü. Swachh Bharat Mission kübok India nung Swachh

Bharat ya asangdang kumdaksütsü mechi Indian Swachhata League 2.0 ya tenzükga, ta Dr. Rhutso-i ashi. Pai kaketshirtem dang iba maongka agia pei aliba tesem nung mürekmejutsü ajungshia liasü. Iba sentong nung temeja ken atenba, tsüngsangba, kongki awaba aser Swachh Pledge agia liasü aser Kohima Municipal Council indang Administrator, T. Lanusenla L. Peseyie-i melepzüng o jembia liasü.



September 17, 2023 nü New Delhi nung India International Convention & Expo Centre (IICC) semzükba sentong nung Ato kilonser, Narendra Modi den Union Ministers- Nirmala Sitharaman aser Dharmendra Pradhan na adenba noksa nung angur.

Delhi nung International Convention & Expo Centre semzükogo

New Delhi, Rongjui/ September 17 (Agencies): Amongnü Delhi nung Ato kilonser, Narendra Modi-i International Convention and Expo Centre (IICC) semzüksüogo.

Ato kilonser Modi-i metro train ka nung Convention Centre jagi aoba mapang nung pai metro nung alirtem den-a sensaksema liasü.

YashoBhoomi (IICC) aser Delhi metro airport line extension semzüksüba sülen Modi-i PM Vishwakarma scheme tenzüksü. Iba scheme kübok teka mapa balala inyakertem nem senotsü teyari aser training agütsütsü. Iba scheme atema sen crore 13,000 lemezükja lir.

Iba sentong nung jembidang Modi-i, "PM Vishwakarma scheme kübok sorkari sen lakh 3 tashi loan agütsütsü. Iba loan atema sen tetemlokji kanga ajemer agütsütsü. Tetenzüklen sorkari sen lakh kaka loan agütsütsü, iba sülen sorkari Vishwakarma partners nem ano sen lakh anana agütsütsü," ta metetdaksü.

PM Vishwakarma Scheme tenzüksüba sentong nung Modi-i, "Tanü linüki International Exhibition Centre YashoBhoomi nguogo. Yangi iba ama mapaji inyak, aser ibaji ajanga Vishwakarma (teka mapa balala inyakertem) adianutemi timtem ajangshiba sayur. Iba Centre ya linük nung Vishwakarma ajak dang sangdonger," ta ashi.

"Iba Centre ya Vishwakarmas atema teyari

tulu asütsü. India nunger teka mapa balala inyakertemi yanglutbatem jagi alima nung jenjang tajung ajangzüksü atema iba ya tongtibang centre ka asütsü," ta pai ashi.

YashoBhoomi Centre ya alima nung MICE (Meetings, Incentives, Conferences & Exhibitions) tulutiba asütsü. Iba Centre ya ali 8.9 lakh square metres nung yanglu.

Iba convention centre nung convention room 15 lir aser item rongnung auditorium ka, ballroom ka aser senden amenba takdang 13 lir aser item takdang nung nisung 11,000 tashi mentetsü.

Tongti auditorium nungji nisung 6,000 tashi mentetsü aser ballroom nungji nisung 2,500 tashi mentetsü. Senden amenba takdang 13 ji ki tamentep 8 tashi nung lir.

Iba project atema 2018 küm September 20 nü Modi-i foundation lung azüngja liasü, aser tasüngnü nungibo mapa tenzük aser yaküm September ita tashi nungbo renemtsü liasü.

Ajisüaka aayangertem nübo agi meperiba aser coronavirus wara ajanga mapa mezülongi inyakba agi menoa merenemet.

Tesüsa September 15 nü iba project renemba sülen anogo ana lir Modi-i iba centre semzüksütsü.

Taoba ita Union Cabinet-i 'PM Vishwakarma' scheme agizüka liasü; iba scheme ajanga sudakertem, merang atsüngertem aser kou mejepertem densema teka

mapa balala inyaker kibong lakh 30 shi tajangzük angutsü.

Iba scheme kübok sorkari küm pongu tsüngda sen crore 13,000 agütsütsü.

Taoba ita Independence Day sentong nung onük jembidang Ato kilonseri, September 17 nü Vishwakarma Jayanti scheme tenzüksü, ta metetdaksa liasü.

PM Vishwakarma Scheme ajanga teka mapa balala (tapu 18) inyakertem tajangzük angutsü; item rongnung süng mistry, rong yanglurtem; merang atsüngertem, hadir yanglurtem, po atepertem, lungro mapa inyakertem, tsüngsem arürtem, molok atalartem, kou mejepertem, süoshi ashirtem aser süoshi arürtem densema lir.

Mezüngbuba küm nung iba scheme ajanga kibong lakh 5 shi tajangzük angutsü aser küm pongu tashi nungbo iba scheme ajanga kibong lakh 30 ayimjemtsü. Iba scheme ajanga tajangzük angutsüpurtem nem PM Vishwakarma certificate aser ID card agütsütsü.

Iba scheme kübok program anaji- Basic aser Advanced Skilling Program asütsü aser skill-based programmes nung shilem agirtem nem anogo shia sen 500 agütsütsü. Tanü-asüng amshiba hadir balala alitsü atema item program nung shilem agirtem nem sen 15,000 tashi agütsütsü, iba sülen mezüngbuba shilem nung sen lakh 1 aser tanabuba shilem nung sen lakh 2 tetemlok 5 percent nung agütsütsü.

Women Reservation Bill atema opposition party aika longjemer

New Delhi, September 17 (Agencies): Parliament nung Women Reservation Bill benoka agizüksü atema takhangba agütsütsü asoshi BJD aser BRS densema party aika longjemogo.

Hombar nungi tenzuka Parliament temeja senden tenzüksü lia sorkari Amongnü party ajak senden ka ayongzuka amen aser iba senden nungi opposition party aikati taruba Parliament senden nung women reservation bill benoka jembitsü atema takhangba agütsü.

Iba senden nungji sorkar tenüng nung Defence Minister Rajnath Singh, Union Minister Piyush Goyal aser Parliamentary Affairs Minister

Pralhad Joshi nunger aden. Senden nungji BJD aser BRS lenirtemi Parliament nung women reservation bill benoka agizüksüla, ta takhangba agütsü.

Party ajak senden nung adenertem rongnung Congress lenir Adhir Ranjan Chowdhury, taoba mapang Ato kilonser aser JD(S) lenir H D Deve Gowda, DMK nungi Kanimozhi, TDP nungi Ram Mohan Naidu, TMC nungi Derek O'Brien, AAP nungi Sanjay Singh, BJD nungi Sasmit Patra, BRS nungi Keshava Rao, YSR Congress Party nungi V Vijayasai Reddy, RJD nungeri Manoj Jha, JD(U) nungi Anil Hegde aser SP nungi Ram Gopal Yadav nunger aden.



September 17, 2023 nü New Delhi nung Parliament building tasenba nung linük wako asongba sentong nung Rajya Sabha Chairman, Jagdeep Dhankhar adenba noksa nung angur.

Hyderabad nung CWC mezüngbuba senden menogo

Hyderabad, September 17 (Agencies): Hyderabad nung Congress Working Committee (CWC) mezüngbuba senden anogo ananü amenba sülen Amongnü tembangogo.

Party-i election atema terenemshiba melung süa agizük aser Centre sorkar den Telangana state sorkari state ashioksür, ta tai tongloktsü.

CWC tasenba mezüngbuba senden ya taküm state pongu-Telangana, Rajasthan, Chhattisgarh, Madhya Pradesh aser Mizoram nung assembly elections agitsü mapang ana nung lia amen. Congress-i Rajasthan aser Chhattisgarh na nung maneni sorkar akümtsü meranger aser Madhya Pradesh nung BJP sorkar atsüngdoktsü meranger.

Anogo ananü CWC senden nungjisa sangküm Lok Sabha election atema-a o lemtepa asalentong yangluogo.

Taoba ita Congress National Tir, Mallikarjun Kharge-i CWC tentetshia liasü. CWC nung züngsem 39 lir, permanent tejaoker 18, in-charges 14, alakteta jaoker 9 aser ex-officio züngsem pezü lir.

Anogo ananü CWC senden nungjisa state balala nungi Congress Tirtem, Congress Legislature Party (CLP) lenirtem, parliamentary party office ketdangpurtem aser Central Election Committee züngsemtem aden.

CWC nung Congress lenir Rahul Gandhi-i lenirtem dak party tangatetba tejanga alitsü

asur BJP sang nung mashitsü ayongzük.

Congress Tir Kharge-i telongjem alitsü, tazüokba alitsü aser taruba election atema lenirtem tsüngda nija mangatettep liaka ajakji toktsür longjemtsü ayongzük.

Kharge-i, "Taruba ita ana- asem tsüngda state pongu nung election agitsü aser Lok Sabha election agitsü ita trok dang lir. Iba dak alia asenoki Jammu & Kashmir atema-a renema alitsüla, kechiyong yangjia assembly election agitsüa akok. Tang mapang ya asenok anisüngzüksü mapang ka masü," ta ayongzuka liasü.

Congress Working Committee-i taruba state assembly elections pongu nung party-i junga inyaktetsü, ta bangzüng renem.

CWC-isa sangküm General election atema terenemshiba jenjang agi melung asüba agizüka, 'asen linük nung nüburtemi temelenshi aginer, anungji party-i nüburtemi imlaba ama tesünep, temeden, loktiliba aser rongsenkettzüng tsütsü kasa temeden agütsütsü' ta bangzüng renem.

Senden tembangba sülen osangbenertem den jembidang Congress media & publicity department nung tongti, Pawan Khera-i senden nung lenirtemi jembiba kar lemsatapa liasü.

Tesülen Congress-i lokti senden ka nung Telangana nüburtem dang tenangzükba pongu sangdonga liasü.



September 17, 2023 nü Hyderabad nung Congress Working Committee (CWC) senden nung Congress Party Tir Mallikarjun Kharge den Sonia Gandhi, Rahul Gandhi aser party lenirtem adenba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, RONGJUI (SEPTEMBER) 18, 2023

Chiajemer Mitkartem

Nagaland nung tebilemstü tulutibaji tangari ozüng raksaba aser tashi mangaba tebilemstü masü saka mitkar (police) temi ozüng raksaba aser tashi mangaba tebilemstü ya asütsü. Asen lima nung dang masü saka alima nung ozüng raksar, yi ajemer aser mozümora achirtem alibajia majung saka tesüngmangtsükabo masü, kechiyong aji alima yimya lir. Ibayongjiang, itemji azüoktsü atema government aküm aser government-i mitkartem shim. Ajisüaka, ozüng raksar aser peisasa pei taküm mazüoktet chia-ajemertem azüoktsü atema shimer mitkartemiang ozüng teraksaba aser chia-tajemba ta süra, ajibo tesüngmangtsüka, shisabolutsüka aser iba lima atemajibo alima tatemer amai asütsü. Tia mejungika, tanübo iba limaji asen lima Nagaland kümogo. Nübortemia kima yimdong nung Nagaland mitkartem inyaksangshiba aser chiajema senzübaji meteter, ajisüaka tangbo tangari masü Nagaland mitkartem rongnung tulutiba Director General of Police Rupin Sharmai yimjak nung Nagaland mitkartem rongnung yi jemer dang masü saka mozü ayoker aser achirtem aika lir, anungji itemji peisasa nangzüka memelenshira mapa nungi khenyongi anentsütsü ta ozüng agüja metetdaksüba jagi, asen lima ozüng raksartem nungi kümzüka ali asü maliar meteter. Atangji, iba tebilemstü ya tang nungi atalokba tebilemstü tasen ka masü saka tejen tashidak aser tebilemstü ka lir. Bilemdangdi süra, Tsüngremi meimba agi chia-jemer mitkartem rongnungang lendong mataloker, ashi yi agi meseper aser mozü agi leter, kechi inyakar memetet lendong tulu ataloktsüsa ana nung lir. Atangji, item tebilemstü ya Nagaland nung mitkartemi bener aruba tebilemstü masü saka parnok shimertemi bener aruba tebilemstü lir, kechiyong peisasa pei mazüoktetba mitkartem taküm kulitemji asüngdangra, parnok teimbaka tajung asüba mitkar kümer külen raksaba takütem masü saka chiajema lia mitkar nung shimokba nübo asütsü. Government nung inyakerkem ajak, kechi mapa nung südir süaka, teinyakner ajak nem merangdangtsü atema mapang peria agüja metetdaksür külenang jungjunga tatidang agir shimer. Ibayongji, inyakerkem ajak pei mapa nung takok ngua inyaker. Ajisüaka, mapang talangka Nagaland nungbo, talisa police paikaya shimaka, Nagaland police nung shimoktsü atema yimjak nung metetdakja 'advertisement' agütsüba mangu aser mangashi. Ashi, mitkartem shimba yabo, Indian army shimba ama, tazüngba nung dang masü saka aso-ajen, temang nung tashidak ali mali, asema osetter asü moutetter aser temang nung tashi ait mait ajak tendanger külenang shimer, kechiyong mitkar shimbaji chiajema kazütsü atema shimer masü saka ozüng raksar mita aputsü aser tsükchir den raratsü asoshi shimer. Ajisüaka meyiper mitkartemang yi aser mozü lar kümra, ozüng raksartemi parnok aputsü asü, parnoki ozüng raksartem aputsü ? Nagaland nung, shisabolutsükaji, Nagaland police-temi yi ajemba dang masü aser mozümora achiba dang masü ano itemji tayoka ayoker ta mitkar tiri metetdaksübaji asütsü. Iba jagi Nagaland sünga yi dang masü saka tanü asüng achiba machimajemtsü mozü "Sun Flower" dena angur. Iba jagi inter state Nagaland police gate nungbo mozü aser yi apuba kangabo mangashir. Aji oda, asen lima yabo Khristan lima masü saka mitkartemi anir yi ajemba aser mozü achiba aser ayokba lima ka kümogo. Item mozü achir aser yijemertem jagi asen lima anüker. Iba tensa tia nungji asenok koda ayipjanga mejangtsü ? Item mozü achir aser yi ajemer police-temji asenoki election mapanga pei amshinüdak amshia takok toktepba otsü indang asenoki jembir. Iba amaji asenok ajak senteper Nagaland raksar. Atangji, ibai peisasa pei taküm mazüoktetba mitkartem taküm melenshir Nagaland tensa yanglushitsüba mapang tajung ka lir. Asenokbo parnok maitsüli saka asenoksasa asenok aitsüdi, kechiyong parnokji parnoksasa shim masü saka asenok yimten yimsüsür aser mitkar tulurtemi shim. Ashiko, tanüa iba yimobilem azüngdang, Nagaland police karbo yi agi meseper aser mozü agi leter, tangar lu nung mesüra kisüdak alitsüa akok. Iba nung jagi parnok tiri ajabaji angashia melenshitsü imlar.

OLEMSABANG

MISSION TO THE NAGAS ASER OKADAK AROGO OTSÜ TEMETEN BUSHIBA

- Walu Walling & Wati Longchar

Taküm 2023 nungi 150 jubilee nung nangzüka nukla tasen nung jajatsüba mapang ka nung, ABAM okadak Arogo otsü ochi o bendang bushitsüsa akümba yabo tim masü ta angateta, YSS nung iba onuk dak sendakba benoka sendaksem aka. Anogo ana-asep tashi sensaksemba ajakbo rasaa meshitetsü aser tenung tetshia meshitetsü. Tongmelang agi sensaksem olen kar den iba ocet tephong kümstür tebilemba kar enoksema shisadangtsü asoshi lemsateper. Ibai ocet nung magizüktetsüsa olen kar lira aji meyipa agir, saka shisatsü tasen karbo tebilemdangtsü angutsü ta imlar iba ocet lemsateper.

Tebilemstü

- Arogo okadaki aotsü asü maotsü? Ya tim asü masü? Lai tesayuba kechi? Kobala tebilemstü nung arogo okadaki aotsü?
- Molungyimseni Jubilee sentakba ken-o nung ABAM Sanen Luden den telemtetba tajung aginua aiben asüngdang aser Central Council nunga küm ana tashi jembinua mapang mepishi saka memela ta ashir. Sanen Ludeni kechiba memela? Parnok tebilemba kechi aji angadangtsü tim masü no? Molungyimseni mepishir mapang memelara, parnok atema Court-ji dangato?
- Naga tenem nung First Baptist Church-ji koba? Nagaland aser Ao Mungdang koba küm aser anogo agitsü? Molungkimong aser Molungyimsen metetshi Naga nunger Khristan otsü mabensatsü, saka missionary nuklabo "Mission to the Nagas", Naga nunger ajonga Khrista dangi anir arutsü aser China tashi oa Khristar Osangtajung sayutsü nukjidong liasü. Tanü arogo otsü nung ni "tambu" ta raktepba nung "Mission to Molungkimong and Molungyimsen" ama dang jembir. Ya bentetsüla.
- Kechiba Molungyimsen arogoi tambu rakteper? 1965 Sungratsü Mungdang nung tzüsenba küm arogo tenzüka küm agitsü lemtet. Iba nungji ajemdaker Ao arogo ajak jubilee monga arur. Iba telemtetba anema Molungkimong, Molungyimsen, mesura Ao arogo kari magizüktetba o aguja lir asü masü? Aguja malira telemtetba anema kechiba ola adoker? Mesura, küli tejangja kar nguteta ali asü?
- 1986 special committee finding ya tatembang asütsü asü masü? Special Committee puri ashibaji tatembang asütsü asü tarutsü lanur asoshi research agia shisatsü tasen bushiloka aotsü lapoka yutsütsü? kaket züluba dena bandh sutsütsü na?

Tekümdangtsü o

Special Committee 1986 report nung ashiba ama, "Memetetba mapang tesuiba arogo otsüren meimchir tashi mait ajanga Missionarytem nungi tenzüka arogo aser Ao Mungdang nung tenzüker tashi inyaka aruba mapatem nung teti dangbo tabensa inyaka mali, aji oda aibelena inyaksema ajiteta aru...." Record aika nung mabensa aser tashishitsü aliba ajanga scholartemi pei angatetba aser tebilemba aika shia angur. Aji par tangatetba aser aji agiang ta mashir. Ano temalen Ao arogo nung samanirji Molungyimsen nungi teimba liasü aser par arogo otsü aika record nung lir. Anungji o anatsülen balance sua sensaksemtsü lenir kari ayongzük.

Atangji meimchirji kodanga tabensa masü. Meimcheri dang inyaker asü nung missionary record balala, mungdang telemtetba, arogo otsü, tebang agi jembia aruba otsütem ajak nungji ochi lir, saka tebensa masü. Pei yimer, taginuba, tebilemba atsünga (missionary record nunga, tat. agi, Clark or tebutü Mary Mead tena record meputetba) züluba aser jembiba angutsü. Ibai meimchir tashi mait tulutiba ka ta angatetsüla. Yamaji alima tanga nungapei juri ajungtsü atsünga teratet balala agutsüba ajanga mangatetep aser azü tokshi adoktsüba otsü nung azünger. Aji meimchir tashi mait ajanga ta metetdi. Ao arogo iba aibelen nungjagi jenboa mali ta YSS sensaksemer ajaki aji shitak ta jembitep.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Artang Baptist Arogo Mokochung nung September 13 nungi September 17, 2023 tashi Fathers' school agiba sentong nung adenertem tangokba noksa nung angur. Iba sentong nung Rev. Dr. Bendang Longkumer, Pastor tesayur liasü. Iba sentong nung tebutem 34 dena graduate süogo.

Kaduna State nung pastor 23 tepset aser Tenla ki 200 shibangtsüogo

September 17, 2023: Tesüiba küm pezü tsünga Nigeria kübok Kaduna state nung kiralongrartemi pastor 23 tepsetogo aser Tenla ki 200 dak tema shibangdaksüogo, ta tawa Kaduna State nung Christian Association of Nigeria (CAN) Chairman, Rev. Joseph Hayab-i metetdaksü.

Commissioner of Police, Musa Garba aser pastor tem den senden amenba mapang nung Rev Hyaba-i iba osang ya metetdakja liasü. Iba sendenji Kaduna state nung Khristantem anema inyakba tatalokbatem asadangtsü atema ayongzükba liasü.

Rev. Hayab-i, "August 8, 2023 nü apuba pastor kati CAN lenirtem dang, auer telok balalai Birnin Gwari arem nung Khristan 215 pua lir ta metetdaksüogo. Tang tashi parnok yangji lir," ta shia pai commissioner of police dang ozüing alema inyakba mapatem nokdangtsü mepishi.

Taoba mapang Evangelical Church Winning All nung Secretary, Rev. Yunusa Nmadu den pastor temia Kaduna state

nung tesempa o jembir yimsü lenirtem anema inyaktsü mepishi.

Parnokisa police dang temesepba mozü ayokertem aser state nung ozüing alema inyakertem anema bushisüngdangtsü mepishi.

Police Commissioner, Garba-i, "Ozüing alema inyakba nungji tamangba yimsü sendaktepa mali. Nisung ajak nem security agütsüsüji sorkar dang masü ajak teinyaktsü mapa lir," ta ashi.

Garba-isa, iba senden ya police aser yimsü lenirtem tsünga tesendaktep tajungba akümtsü aser tebilemtsü onük balala bentetsü nükjidong nung ayongzük, ta metetdaksü.

North-West Nigeria nung auer telok balalai timtem kanga agütsüba state 6 rongnung Kaduna state densema lir. Tesüiba küm pezü tsünga nisung noklang aika tepsetba den noklang aika puer ogo.

Rev. Hayab-isa, Birni Gwari nungi Chukun aser Kajuru tashi nung Baptist Arogo 115 indang Tenla ki tashiyim amshia shibangtsüogo, ta metetdaksü.

"Tenla ki aika shibangtsüba agi item Arogo nung pastor tem aika tanga Arogotem nung ang adener. Kaduna state nung security maliba agi onoki Tenla kitem shibangtsüba akümer," ta Rev. Hayab-i sangdong ka nung metetdaksü.

Taoba hopta nunga Kaduna state kübok Fadan Kamantan area nung kiralongrartemi St. Rachael indang Parish kübok putirtem ki telung nung lia mi senoktsüogo; iba tesemji tongti highway ka aser sepaitem checkpoint ka anasa lir.

Iba lendong nungjagi putir anabo jena otet saka seminarian, Naam Ngofe Danladi bo rongset.

Kiralongrartem jena aoba sülen ang sepaitem iba tesemji tonga aru, ta International Christian Concern (ICC)-i metetdaksü.

Taoba ita nunga Kaduna state nung Khristan ana puer ao aser pastor ka tepseta liasü.

Yaküm alima tesem balala nung Khristan 5,600 tepseta liasü aser iba nungjagi shilem 90 dak temabo Nigeria nung Khristantem liasü (Open Doors).

Madhya Pradesh nung Khristantemi sorkar scheme ka ashishir

September 17, 2023: Loktii nisung tepsetba ajanga takoksa angur kibongtem nem senotsü teyari million 1 agütsüsü atema Madhya Pradesh state sorkari scheme ka sangdongogo, ajisüaka Khristan lenirtemiba iba scheme ji ashishir.

Sarva Isai Mahasabha (All-Christians Grand Council) Tir, Jerry Paul-i, "Sen million 1 teyariji tangatsübo kanga junger, ajisüaka atangji nungbo, ibaji ajanga state sorkari pei nüburtem mekümzükteba noksa sayur," ta metetdaksü.

September 9, 2023 nü Madhya Pradesh sorkari 'Mob Lynching Victim Compensation Scheme' sangdonga liasü; iba

scheme kübok loktii nisung tepsetba ajanga takoksa angur kibongtem nem senotsü teyari million 1 agütsüsü. Iba scheme kübok loktii nisung tepsetba tatalokbatem nung yirur nem-a senotsü teyari agütsüsü.

September 15 nü osangbener den jembidang Jerry Paul-i, "Nisung ajak kümzüktsü aser item ama ozüing alema inyakba mapatem nokdangtsüji sorkar teinyaktsü shilem lir," ta ashi.

Khristan lenirisa item ama ozüing alema inyakba mapatem nokdangtsü atema sorkari ozüing tesashiba benoktsüla, ta takhangba agütsü.

2014 küm nungi tenzüka

India nung loktii Dalit nungertem aser Muslim nungertem tepsetba kanga bulua ataloker.

Talisa nashi kümzükba tenüing amer nashi kümzükertemi Muslim nungertem aser Muslim nungertem tepsetba kanga bulua ataloker.

2012 küm nungi 2022 küm tashi nung nashi kümzükba telok balalai ozüing alema inyakba tatalokba 82 lir, aser item tatalokba balala nung loktii nisung 45 tepset aser nisung 145 yiruttsüogo.

Tang tesüsa July ita nung Haryana state nung lokti kati Muslim nütsüing teimba aliba Nuh district nung nisung trok tepsetogo.

ANOGO ABEN TSÜNGREM DEN

Baptiba

Tita 3: 3-8

Nenok temenen atoktsü asoshi nenok temulung meyipang aser nenok nisung shia Kibuba Yisu tenüng nung baptiang. T. Mapa 2:38 Martin Lutheri ashi, "Khristan kati baptiba kuliji yipten jara nung idaka yuang aser iba jagi anepdang shia saker aji angudang pa/la baptiba bilemtetdaksütsü.

Baptiba nung Tsüngremi asenok Par chirtem ama agizüker. Tanur kati obendang dak mesütetba tamaittsü inyakyim mangatetter. Tsüngremer kidang kinü tanur asoshi baptitsübajia lir. Lai/pai amatoktsü akok, saka iba jagi baptiba mapang tongtipangji ajema kümdaksür ta masü.

Baptibaji Tsüngremi asenok par chirtem ama mesütetyim lir. Kodang asenok baptir, Khrista asenok adianu akümer. Asenok Par kibong nung züngsem ka akümer.

Asenok baptibayim jagi aser Tebu teka asenok tsütsü songtoka lir ta ashir. Iba tetezü tekümtetji iba kisüng nungi angutsü ta masü kechiaser pa nungi meyipa aotsü akok saka pai asenok nungi kodang meyipa moatsü. Asenok nungi jena aotsü aser Pa meyong mesüi akümtsü akok saka Pai kodanga asenok nungi jena maorer aser asenok mesentoker.

Pa temeim aser tatok teti asenok tsütsü lir. Kibuba, ni baptiba taochi nung alitsü yariang; Yisu tenüng nung. Amen.

Taliban teloki America nunger ka densema Khristan 18 apu

September 17, 2023: Taliban Khristan yimsü indng teloki Afghanistan nung Swiss sayutsüngiba aser iba yimsü nunger melungtet telok ka indang office mita aoba mapang America nunger ka densema melungtet telok nungji inyaker nisung 18 puogo; parnoki Khristan yimsü indang sayutsüngiba agi apu, ta sorkari metetdaksü.

Hokolbarnü (September 15) International Assistance Mission (IAM)-i, Taliban züngsemtem parnok indang office-i September 3 aser September 13 anogotem nung aru, aser IAM nung inyaker 20 jungnüa puer ogo, ta metetdaksü.

IAM indang office ji Afghanistan yimtiba, Kabul nungi mile 400 shi pilar Ghor nung lir.

September 3 nü mezüing IAM indang office mita arudang America nunger ka densema nisung asem puer ao aser anogo 10 shi lir tanaben kasa office mita arudang nisung 15 apu.

Parnok 18 prongla mejangjaba tesem kati anir ogo, ta IAM-i metetdaksü.

Swiss nunger charity telok-IAM-i Afghanistan nung healthcare aser shisaliok agütsür.

IAM-i sangdong ka ajanga, "Parnoki mita aruba kuliji onoki memetet aser ozü staff züngsemtem pua ayuba kuli onok nem memetetdaksür," ta metetdaksü.

Ajisüaka Taliban ketdangsertemiba, parnoki

Khristan yimsü indng sayutsüngiba aser iba yimsü ajungkettsüba atema apu, ta metetdaksüogo.

Sorkar otongdar, Abdul Wahid Hamas-i, "America nunger ka densema nisung aika puogo. Muslim nunger nütsüing teimba aliba linük nung parnoki Khristan yimsü indang sayutsüngiba aser iba yimsü ajungkettsüba atema parnok apu," ta metetdaksü.

IAM-i, "Ozü staff tem kümzüka alitsüji onok atema kanga tongtibang. Parnok dak kecha mataloktsü aser tekaraba nung chiochtsü atema onoki akok tashi ajak inyakdar," ta metetdaksü.

IAM-i Ministry of Economy nem temepishiba shidi ka agütsüogo, iba denji külemi par staff tem chiochtsü atema UN aser ACBAR den tongtepratepa inyakdar.

IAM teloki tesüiba küm 60 jungnüa Afghanistan nung inyaker. IAM ya Khristan organization ka lir aser parnoki Afghanistan nung healthcare den shisaliok ajungkettsütsü atema inyakba den külemi loktiliba nung terenlok atema inyaker.

Ajisüaka IAM-i Afghanistan nung aliba ozüngtem kübok alir. Küm ana tejaklen US sepaitemi Afghanistan linük toktsür aoba sülen Taliban-i sorkar atsüngdok aser parnok yimsüsüba kübok linük nung melungtet telok balala dak tenük yokba den külemi ozüing tesashiba benoker.

AO OSHI ANGAZÜKDAK:
TANÜ ANGAZÜKTSÜBA OJANG



Salangtem

(n) au agi salang atemba (bamboo made platform)

* **Salangtem** nung putu melentepdang ken o belenzüka ashir.

Salapela

(adj) sadoksadoka pelatop (open air entertainment)

* Benjong mapang **salapela** sentong nung nisungtem pelatop.

OLONG PAITEP # 6640

1		2		3		4	5		
				6					7
		8							
9				10		11			
			12					13	
						14			
16						17			

TIPLIN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S _ _ _ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizügdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6639 TELANGZÜBA

TIPLIN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiochtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

Agüja aliba noksa nung meputepi aliba 9 bushiang



Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

PM Modi-i 'Amrit Brikshya Andolan' atema Assam CM tenüng asanger

Guwahati, September 17, 2023 (Agencies): Assam nung Amrit Brikshya Andolan ta ser süngdong core atemtsüba mapa tenzükba atema Prime Minister Narendra Modi-i Chief Minister Dr. Himanta Biswa Sarma nem tenüngsang agütsüogo.

Prime Minister Modi-i CM Sarma dangi züluba shidi ka nung lipoküm wazüka ayutsü merangba aser nübertem taküm tiptema liyonga aotsü mapa tajung inyakba atema tenüngsang agüja lir.

Amrit Brikshya Andolan ya Assam ajungalen süngdong atemtsüba mapatong lir. India-i clean and sustainable growth alizüng atongtsü atema inyakba den iba campaign sendakteper. Iba ajanga Jan Bhagidari (public participation) ajungketer aser nübertem dang lipoküm wazüka ayutsü ayongzöker.

"India nung alemli nungi sobaliba aser putiotsü nung süngdongtem ya kanga tongtipang süa benshir. Sanskrit subhashita nung süngdongtem ajanga mopung merüchtsüba aser tashidaktem agientsüba indang shia lir. Iba tangatetba ajanga Assam nung dang masü saka linük ajungalen süngdongtem atemtsü aser kümzüka ayutsüla" ta PM Modi-i metetdaksü.

Amrit Brikshya Andolan amala sentongtem ajanga India-i clean and green growth nangzükba nung tongti shilem agir ta paisa ashi.

PM Modi-isa Amrit Kaal mapang Amrit Brikshya Andolan takok ngua inyaksü moatsüogo.

METETDAKTSÜR

Mr. Chubalepden Jamir, S/o asür Mokochiba Jamir (Longpa), 6th June 2016 anogo nung kinunger tetsü toku aser anükapangtemi pa jaoker ken-o ajak jembir pa mapa dak alang iba anogo nungi tenzüka pai bener aruba ken-o aser sentsü kecha kinungeri memetet aser matener ta lemtetba iba zülü ajanga metetdaksür.

Anükapangtem -

- 1. Limatoshi
- 2. Moatemsü
- 1. Takosunep
- 2. Imsenperong
- 3. Imtimeren
- 4. Imnalepden

Chirnur aser Kinungertem -

LAND FOR SALE

Yimyu Ward nung Ali kimong ka tayoktsü lir. N.I Jamir School matongdang kimong tonga gari aor. Talinertemi agüja aliba number nung tongteprateptsü akok.

8794670746 / 7827285864

Meghalaya-i nashi bener aoba gari ka Guwahati nung apu



Guwahati, September 17, 2023 (Agencies): Guwahati nung Assam police-i Jorabat tesem anasa nashi 41 kümzükogo.

Police-i Jorabat nung 12-wheeler truck gari ka soter mita reprangdang Meghalaya-i nashi bener aoba angu.

Truck gari (AS19 AC 1032) nung Tezpur nungi Meghalaya kübok Byrnihat-i nashi 41 bener aoba apu.

Iba dak sendakba nung police-i gari driver aser teyariteper apu. Tena ya Arshad Ali aser Ajar Ali na ta jangaogo.

"12 wheeler truck (AS19 AC 1032) ka nung miima Byrnihat-i miima nashi bener aodang Jorabat OP nungi EGPD telok kati gari apu. Police-i nashi 41 kümzük aser tasü angu. Abhayapuri nungi Arshad Ali aser Ajar Ali na pua lir" ta Guwahati police-i metetdaksü.

Manipur nung Indian Army ka pur orr tepset

Imphal, September 17, 2023 (Agencies): Manipur kübok Imphal West nung mejangjatetba nisung kari Indian Army sepai ka pur oa tepset.

Iba nisung ya Sepoy Serto Thangthang Kom (39) ta jangaogo.

Pa ya Manipur nung Kom kin nungi liasü aser nübo tajemtiba kintem rongnung ka lir.

Serto Thangthang ya leave nung liasü aser September 16 nü Tarung, Neikanlong, Happy Valley nung par kidang nungi pur ao.

Pa ya Leimakhong Military Station, Manipur nung mapa lemsüka liasü.

Serto Thangthang'er arishi küm 10 tain jabasoi ashiba agi tebu tena kima nung mapa inyaka lia nisung asem arur tebu dak pistol agi tekolak nung tuitar gari temesüng ka nung anir ao.

Iba tatalokba sülen pa indang osang kecha maliasü saka Deobarnep Khuningthek Village nung pa indang tasü angu.

Pa indang maitüsü ya par kinungertemi jangjateta liasü. Pa tekolak nung injang agi akhaba

zübo keta liasü ta osang ajanga ashi.

Asür Serto Thangthang indang tasü angu JNIMS, hospital, Imphal East district nung post-mortem atema bener ao.

Sepoy Serto Thangthang Kom-i pa kinungtsü, jala aser jabaso toktsür alima nungi pilaogo. Par kinungertemi aginüba ama pa den asüpila sentong agitsü aser akokba tashi yariteptsü atema Indian Army telok ka par kibong dangi yokogo ta osang ajanga ashi.



Kaketshirtem nem lipajen wazüka ayuba yimyattem angazükdaksütsü nükdong nung Assam Rifles temi September 17, 2023 nü Wangto School, Chenloisho, Mon nung süngdong atemba sentong ya ayongzüka liasü. Iba mapang Wangto aser Silam nung azünger temi süngdong 125 atem aser tarutsü putu asoshi alima kumzüka yutsütsü tenangzükba agia liasü.

North Korea lenir Kim Jong Un-i Russia sema jajaba temogo



North Korea sorkari agütsüba noksa ka nung North Korea lenir Kim Jong Un military aircraft reprangtsü asoshi Russian Far East kübok Vladivostok yimti tonga arudang Russian Defense Minister Sergei Shoigu-i agizükba noksa nung angur. Iba noksa nung anguba sentong nung jurila osangbenertem shilem magidaktsü.

Moscow, Rongjui/Sept. 17 (Agencies): North Korea lenir Kim Jong Un Deobarnü Russia nungi ayamesogo, anungji Vladimir Putin den tesendaktep tajung yanglushitsü mechi semdangba tatem kati arur aser Ukraine amaktsü asoshi Pyongyang-i Moscow nem nok-nü agütsütsü akok ta Western linüktem tsüboteper.

Kim-i Mongulbarnü nungi tenzüka Russia anüdoklen aliba region tem sema jajaba ya talisa mitkar tsütsü rangloker liasü, aser pa den arurtem timba mitkar lenirtem liasü, Putin den rifles melentep aser Komsomolsk-on-Amur nung fighter jet factory semdanga liasü.

Kim par linüki meyipa aotsü mapang regional governor kati pa nem sempet ama explosive drones pongu, reconnaissance drone ka aser bulletproof vest ka agütsü, ta ashir.

DPRK lenir nem kamikaze drones pongu, 'Geran-25' reconnaissance drone ka

agütsü, ta Russian news agency TASS ajanga ashi.

China aser North Korea den arütsüa aliba Primorye region indang governor-i Kim Jong Un nem bulletproof protection set ka aser thermal cameras agi putettsü makokba süoshi balaka agütsü.

Deobarnü Ria Novosti agency ajanga Kim linük yutsür aoba indang video ka prokshia liasü aser pa aoba sentong ya Artyom-Primorsky-1 station nung agi ta ashi.

Video nung Kim-i pa indang train nungi Natural Resources Minister Alexander Kozlov -i anir Russia nunger kettangsurtem dang teka ayiplojka liasü.

Akhi mapang nungi tembar süa aruba Russia aser North Korea linük nem alimai tenokdangba balala agüja lir - Moscow-i Ukraine amakba atema aser Pyongyang-i nuclear nok-nü tendangba atema.

COVID-19 pandemic sülen North Korea lenir linük yutsür aoba ajanga Moscow aser Pyongyang tsungta nok-nü tsütsü tezüngzüktep yanglutsü akok, ta anüolen linüktemi tsüboa bilemer.

Moscow nungi kilometre 8,000 shi pilar Vostochny cosmodrome nung Bodhbarnü Kim den senden amenba sülen Putin-i North Korea den tesendaktep ulushitsü indang jembia liasü.

Ukraine nung maneni raratsü asoshi Moscow-i North Korea indang ammunition alitsü tejangraba lir ta amanger aser Pyongyang-i missile yanglutsü atema Russia teyari aginer.

Kremlin-ibo tezüngzüktep kecha meyangu aser meyangu ta shia lir.

Honibarnü Kim-i Vladivostok nung Russian defence minister ajuru aser yangji pai hypersonic missile system ka densema nok-nü balala repranga liasü.

Ukraine-i drone amshia Crimea aser Moscow amak

Moscow, Rongjui/September 17 (Agencies): Deobarnü Ukraine-i drone amshia Crimea amakba nokdangogo aser iba den drone temisa Moscow makokogo, koba ajanga linük yimtiba nung air traffic minpronga liasü aser linük southwest len oil depot ka nung mi adoka liasü, ta Russia-i metetdaktsü.

Ukraine-i tawa Russia-i atsünger aliba Crimea nung military target tem aser Russia indang Navy Black Sea Fleet facility tem maka arudar. Iba tesem nung Russia inyakym raksatsütsü asoshi Ukraine-i meranga arudar.

Kasa mapang nung tang rara aliba tesem nungi talangka pilar Russia telung nunga Ukraine-i tesem balala amakba tali kumogo aser Moscow mayor-i ashiba agi, Deobarnü linük yimtiba temeket nung drone ana khazüka yokogo.

Honibar aonung Ukraine indang Security Council secretary Oleksiy Danilov-i,

kyiv nem teyari agütsüba linüktem dang prangbong injangtem takaratiba nung agütsütsü mepeshia metetdaktsüogo aser ashiba agi iba ajanga dang rara tembangdaktsütsü.

"Tatishitsü agi Russia indang Black Sea Fleet ajunga mesüra tera raksatsüba, koba takoktsü mapa ka lir, iba ya inyaktetra Russia rara nungi tugutsü atema lenmang ka takaratiba nung bushitsüsa akümtsü," ta Danilov-i, Ukrainka Pravda news site nung zülutsü.

Russia indang air defence systems-i tesem trok nungi Crimea amaktsü merangba drone tem raksatsüogo, ta Russia indang defence ministry-i Deobarnü sangdong ka ajanga metetdaktsü.

Telegram messaging app ajanga agütsüba osang ajanga Crimea peninsula nung teraksatsüba adokba mesüra nisung asüba indang osang kecha magütsü. Moscow-i Ukraine mamak tsüngda kum ti

tejakdang 2014 kum Crimea ya atsünga liasü.

Moscow temeket nung Istra district nung drone ka aser Ramensky district nung drone ka raksatsüogo, ta Moscow Mayor Sergei Sobyenin-i Telegram ajanga metetdaktsüba den drone raksatsüba mapang nisung asüba mesüra teraksatsüba kecha mataloki liasü, ta shisem.

Maneni Moscow kübok tongtibang airport tem nung tayimtsü 30 menor apuso aser tayimtsü trok tashi thia liasü, ta Russia indang state news agencies-i metetdaktsü. Drone amshia Moscow amakba mapang aviation kettangsurtemi iba jenjang ya agia arudar.

Southwestern Russia nung Ukraine nunger indang drone kati Deobarnü anepdang oil depot ka raksatsüba sülen totzü ayuba tank ka nung mi atok, ajisüaka mapa tatsüka lir remsepja liasü, ta regional governor-i ashi.

(Maneni tapak 8 nung...)

Mulungnen O



ASO : 15/03/1928

ASÜ : 13/09/2023

Onoki teti meima aliba asür obala **Nokdenchiba Aier** (Longpa) Sept 13, 2023 anogo pa teti anisüngzük limai ogo. Onok mangyim tia nung alidang kija, kibong, arogo aser lokti shimokisa sarasadem den nübu aser rongsen agi nungita yaritepogo, kija shia dangi arua onoki pelaba meshitetaka iba osang ajanga nenok temeim mapa tajung asoshi ajak dang kanga pelaba lemsateper. Asen tulusang Tsüngremi nenok ajak moajangma.

- Kinungtsü, Chirnur, Semchir aser Kinungertem.

Mali, Niger aser Burkina Faso lungjemer Sahel security alliance amenok

Bamako, Rongjui/Sept. 17 (Agencies): Mali, Burkina Faso aser Niger linüktemi 'mutual defence pact' ka zülutepogo, kechiaser Sahel nung aliba linük asem ya telungpur telok balala mesüra bendangeri tashi amshiba mapang kati ka yaritsü nükjidong lir.

Honibarnü zülutepba charter dang ya Alliance of Sahel States ta ajar aser iba ya ajanga dangari linük asem rongnung ka dak dang amak nunga mitkar densema kati ka yariteptsü shia lir.

"Linük ka mesüra tali dak tashi temeden aser litsü-lika anema timtem agütsüra, ibaji ajak anema inyakba ama züngshitsü," ta shia lir. Iba yagi linük asem nung yimten anema nokdaker nokdangtsü mesüra angatetteptsü asoshi yaritepa inyaktsü ashir.

"Defence tsütsü lungjemsü aser tangatetep tajung nung yariteptsü nükjidong nung Alliance of Sahel States amenoktsü asoshi Burkina Faso aser Niger lenirtem den Liptako-Gourma charter nung tanü ni meyongnem agütsüogo," ta Mali mitkar lenir Assimi Goita-i pa indang X social media account nung ashi.

Liptako-Gourma region ya Mali, Burkina Faso aser Niger arütsü ajurutepeba tesem ka lir, aser yangi kum ishika telungpur temi timtem balala agüja arur.

"Iba alliance nungya linük asem tsüngta mitkar tsütsü aser rongsenketzüng tsütsü teyaritep alitsü," ta Mali indang Defence Minister Abdoulaye Diop-i par linük yimtiba, Bamako nung osangbener dang ashi.

"Onük asoshi teinyaktsü tongtipangtibaji linük asem nung kiralongrar den raratsü ya lir." Mali north tsütsü 2012 kum

nok-nü amer yimten yimsüsür anema nokdak aser 2015 kum Niger aser Burkina Faso tashinung prokshia ao.

Linük asemprong ya France-i yariba G5 Sahel alliance nung züngsem lir, koba al-Qaeda aser ISIL (ISIS) den sendaktepa aliba telungpur telok azüoktsü mechi 2017 kum tenteta liasü. Iba telok nungya Chad aser Mauritania dena lir.

2020 kum nungi item linük nungya mitkar temi tashiyim amshia sorkar atsüngdoka arur, tesüsa Niger nung July ita sepaitemi Tir Mohamed Bazoum atsüngdok, shiba Sahel nung amenoka aliba telungpur telok den raraba nung West den teka amtepa liasü.

Mitkar temi sorkar atsüngdokba mechi West African regional bloc ECOWAS ajanga Niger nung mitkar tashi amshitsü amokmeren, saka parnoki raratsü otsü jembiba tang tera ajema kumogo.

Mali aser Burkina Faso-i kanga kera iba ama operation agibaji onok anema rara sangdongba ama züngshitsü, ta telangzüba agüja liasü.

Mitkar temi sorkar atsüngdokba sülen France aser linük asem tsüngta tesendaktep mejungi kumogo.

France sepaitem Mali aser Burkina Faso nungi anienogo aser Niger nung yimten tashi rakzüka mitkar tem den mangatetep adoka lir. Mali-i UN indang peacekeeping mission MINUSMA dang linük nungi ainshitsü shia lir.

France-i mitkar kettangsurtem agizüktsü memolungba mechi Niger mitkar yimsüsür temi France dang par sepai aser ambassador anir aotsü shia lir.

End of an Era' football club Jersey sayaogo



K. Neibou Sekhose den asyartem Kohima nung Honibarnü nikonngtsütsü tangokba noksa nung angur.

Kohima, Rongjui/September 17 (TYO): Kohima nung amendaker aliba End of an Era, football club-i taruba 23buba NSF Martyr's Memorial Trophy 2023 atema club jersey sayaogo. Iba asayamung ya Hombarnü nikonngtsütsü nungi tenzüka IG Stadium Kohima nung asayatsü.

'End of an Era' club ya Nagaland Senior football team squad ka lir, shirnok külemi NSF Trophy tatembangbuba asayatsü asoshi adenshiogo. Iba asayamung tembangba sülen asyartem timba asaya nungi anentsü.

Nagaland Football Association tir & AIFF Executive züngsem K. Neibou Sekhose-i Honibarnü nikonngtsütsü 2K hotel Kohima nung jersey sayaja liasü. Sentong nung o jembiba mapang Sekhose-i, asayar tejentemi Nagaland Football tejakdangi anir aoba nung teyari agütsüba atema parnok

nem tenüngsang agüja liasü. Paisa, iba club yagi asayamung nung shilem agiba ajanga lanurtem ajungmesotsü aser kümtem tsüngda parnoki angazükbatem lokti nem meyipa agütsütsü imlaba lemsatop.

Maneni pai football asyartem ya coach, mentor mesüra referee akümtsü imlaba lemsatop, ajita asünungdang lanurtemi parnok tsüngsü nung anidaka district, state aser national jenjang nung tokteptsü, ta ashi.

Iba sentong nung Kohima District Football Association tir Matthew Yhome aser Chief of Referees Kutu Sekhose natia shilem agia liasü. Iba sentong ya Kiyakhrienuo Solo lenisüba nung agi aser Temjen Ao-i Tsüngrem temaotsü meshizüka sarasademba den Vivonuo Belho aser Moko Koza nati ken tajung ka tena liasü.

Club sangdong ka ajanga ashiba agi, team nung asayar timba veteran asyartem lir

asem parnok asaya nungi manen tsüngda toktepa asayaba asayamung ka nung asayatsü nükjidong lir. "Iba team nung tanur aser tain ajak meyoktepa lir," ta club-i metetdaksü.

Team-isa, iba asayamung nung shilem agiba ajanga football asaya ya sütöksünemtsü atema dang masü saka nükjidong temaba tongtettsü asoshi asayatsü atema lanurtem ajungmesotsü imlaba lemsatop.

Parnokisa, team yagi kati ka taoba ta züngshitepba, telongjemer temeimtep aser asaya asoshi tejangraba adokdakja taküm nunga takok nguyonga aotsü asoshi arok nükjidong tongtettsü imlaba lemsatop.

"Onok mapang talangka football asaya arur aser state atema-a konang tetushi bener arutsüogo. Iba ya onok asoshi tatembangbuba asayamung asütsü," ta football asayar Ating Konyak-i ashi, shiba team nung züngsem ka lir.

ISSF World Cup: Elavenil-i Rio de Janeiro nung gold medal angu

Rongjui/September 17, 2023 (Agencies): Olympian Elavenil Valarivan-i tetsür 10m air rifle event koka International Shooting Sport Federation (ISSF) World Cup Rifle/Pistol tetoktepa nung tanabuba gold medal nguogo.

Asayar ti asayaba final nung Elavenil-i kanga junga asaya aser shot 24 prongla nung lai 10.1 tekübok khen danga mekhai liasü.

Lai ajak senteper point 252.2 angu aser France tsür arishi küm 20 tain Oceanne Muller aser China tsür Zhang Jiale na ajateta gold medal nguogo. Oceanne-i point 251.9 ngua silver aser Zhang-i bronze medal ngua liasü.

Qualifying round nung

Elavenil-i point 630.5 nguteta tibuba nung qualify süa liasü.

Qualifying round nung Muller-i point 633.7 ngua la ajak dang temaba liasü aser China tsür Zhang Jiale aser Zhang Yu (Olympian) na aser reigning European champion Norway tsür Jeanette Hegg Duestad nungera final nung asaya liasü.

Tebur 10m air rifle event nung India nunger rongnungi Sandeep Singh kija liasü aser pai qualification nung point 628.2 nguteta pa 14buba nung tembanga liasü.

Hokolbarnü Elavenil aser Sandeep nati 10m air rifle mixed team event nung point 629.1 ngua pongububa nung tembanga liasü.

Pezübuba aser tatembangbuba medal-round spot ya Israel-i nguteta liasü. Team 42 asayaba nung Israel team ya India dang nungi point 0.5 agi timba liasü.

Elavenil-i point 314.8 aser Sandeep-i point 314.3 angu ajisüaka bronze medal atema asayatsü atema tera agi maongka monguteti liasü. Iba asaya nung Germany-i gold medal angu aser Hungary-i silver medal ngua liasü.

Rio World Cup nung India team nungi asayar 16 Olympic events tenet nung asaya liasü. Medal tally nung Italy team-i gold medal ana ngua parnok temaba jenjang nung lir aser Armenia o India na tasembuba jenjang nung lir.

Ukraine-i drone amshia Crimea...

(Tapak 7 nungi...)

Ajisüaka depot ya drone teraksa agi raksatsü asü drone-i amakba ajanga raksa iba indang osang tejangja magütsü.

Kasa mapang nung Ukraine atema air defense hadirtem alitsü asoshi Britian-i aniba telok ka nem Canada-i C\$33 million agütsütsü, ta Defence Minister Bill Blair-i Deobarnü ashi. Russia indang missile aser drone tem nokdangtsü atema Ukraine

nem teyari agütsütsü asoshi iba hadirtem alitsütsü.

Blair-i ashiba agi, Ato Kilonser Justin Trudeau-i June ita Kyiv nem military teyari C\$500 million agütsütsü ta nangzüker aliba nung iba ya shilem ka lir.

Canada, kong Ukraine nungertem aika lir, iba linük yagi yimjak nung Kyiv pusema arudar. 2022 küm February ita

nungi Russia-i Ukraine amak tenzüka sülen Ottawa-i teyari C\$8 billion aser military teyari C\$1.8 billion shi agütsüogo.

Kyiv nem teyari agütsüba telok nung United States, Netherlands aser Denmark densema lir aser parnoki short aser medium-range air defense missiles aser iba dak sendaka aliba system noklang aika alitsü nükjidong lir.

16th Imchaba Masters Memorial Nagaland Open Volleyball Trophy Sept 19 nungi tenzüker

Mokokchung, Sept. 17, 2023 (TYO): Mokokchung District Volleyball Association (MDVA)- i ayongzüka 16buba Imchaba Masters Memorial Nagaland Open Volleyball Trophy tan Sept ita 19th nungi 22nd tashi Multi-purpose Sports Complex, Mokokchung nung asayaa amungtsü sentong renema lir.

Taküm iba asayamung nung telok 19-i shilem agitsü tenüng agüja lir, ta Lakhi Longkumer, Convenor, Organizing Committee-i sangdong ka ajanga metetdaksü. Iba asayamung marok shir teloki bendir parnok nem senpet sen 80,000/- den running trophy aser certificate, atongdakba nem sen 50,000/- den certificate aser tasembuba aser pezübuba jenjang atonger nema sen 30000/- aser 20000/- agütsütsü.

Iba den jurila senpet kar shimteta agütsütsü. Chienino Brothers, Kiruphema, Archippus Club, Dimapur, United Changki, G-Sports, Mokokchung, Ozümi Volleyball Team, Mongsenbai aser Rongpang Club, Tsürangkong item teloktemji taküm iba asayamung nung tasen arurtem asütsü.

Iba asayamung lapokba sentongji 19th Sept, 2023 nü anepdang 10:00 ako nungi tenzüksü aser inüji Col. Rahul Gurung, Kirti Chakra, Commandant, 12 Assam Rifles, Mokokchung tetushi tesemdanger asütsü jaoka lir. Taküm iba asayamung tenzüka mezüng asaya Spartan Club, Lakhuni aser Chienino Brothers, Kiruphema, Kohima na asayatsü.

India cricket team-i Asia Cup 8buba kokogo



Rongjui/September 17, 2023 (Agencies): India cricket team-i Deobarnü otsüsütsüsa Asia Cup tibuba kokogo. Parnoki final asaya nung Sri Lanka team wicket 10 agi ayong ayonga koka liasü. R Premadasa Stadium, Colombo nung final asaya nung Mohammed Siraj-i run 21 agütsü wicket 6 agia team nem teyari tulu agütsü, kong over ka nung wicket 4 agiba densema lir.

Deobarnü mezüng batting amentsü telemtepa agiba sülen Sri Lanka team-i over 15.2 nung run 50 dang yanglur asayar ajak out süa liasü. Asaya nung batter pongu tashi duck chia liasü.

Siraj-i pa indang over tanabuba kanga junga ona pai Pathum Nissanka, Sadeera Samarawickrama, Charith Asalanka aser Dhananjaya de Silva nunger out süja liasü.

Asaya nung Hardik Pandya-i wicket asem agi aser Jasprit Bumrah-i wicket ka agia liasü. Sri Lanka team asoshi ODI asaya nung Deobarnü yangluba run ya tejamtiba run yangluba rongnung tanabuba asütsü. Parnok asayar ajak senteper ball 92 dang asaya liasü.

Asaya tanabuba shilem nung India team-i over 6.1 nung Sri

Lanka-i yanglua aliba run menepa liasü.

Bumrah-i mezüngbuba over nung Kusal Perera out sütsüba sülen Sri Lanka nunger batter tem out asü tenzüker aser Siraj-i ball kanga junga ona batter temi kecha mesüteti aküm.

Kusal Mendis (17) aser Dushan Hemanta shibai out mesüi run 13 yanglua liasü, tenati dang run 10 dak tema yangluteta liasü.

Asaya tanabuba shilem nung India captain Rohit Sharma-i pa meleni Ishan Kishan mezü yok aser Shubman Gill tenati asaya koka liasü.

Asaya nung Kishan-i out mesüi run 23 yanglu aser Gill-ia out mesüi run 27 yanglua liasü. Final asaya ya ajak senteper over 21.3 dang asaya liasü.

Super Four stage nung Pakistan aser Bangladesh na tsükdaksüba sülen Sri Lanka aser India na Asia Cup finals-i ai. Kasa mapang nung Afghanistan aser Nepal nati mezüngbuba round majangteti liasü.

Manen India team iba asayamung tembangba sülen Australia den ODI asayamung ka asayatsü aser team ana ya World Cup nunga October 8 nü Chennai nung asayatsü lir.

BILEMDANGANG
"Nü ket nung kechi ali aji agi temulung mesüra tip mademtsü."